

1 Juwã

Juwã okusiwa ypy maekwerà

Imovyvya

Aã kareta Janejare'e 'Ăg omotekokuwa Juwã tokusiwa Jesu koty rewarà kô pè maekwerà. Jesu remimo'ekwerà tē Juwã. Okusiwa ypy mã'ē tē aã kareta. Okusiwa remē, ayvu e'ekwerà rewarà tē okusiwa. Jesu tē opyteporo Juwã imono okoty rewarà kô motekokuwaarà rômō toiko. Aã kareta okusiwa remē, ika'akuwa tesō Juwã ky'y. Wemikusiwarerà omono Jesu koty rewarà kô pè tomã'ē ee ojimotekokuwa rômō, pirujē taa taa rupiwarà kô pè. "Eãkarãgwerà kô" e'i ijupe kô okusiwa remē. Kee jaa okusiwa okareta rē: "Oromã'ē ee mã'ē tē oromome'u orokupa. Āmō, orereminuwerà teve oromome'u orokupa, tapekuwa", ejaa (1Juw. 1.3).

Kee e'i Juwã ikusiwa Janejare'e poroauvaya rē: "Kee Janejare'e omojikuwa janerauvaya janeupe. Wa'yry wyjaveay mã'ē omuroka ike yvy pè janepytery pè janerereko katuarà rômō, āwisō janereko pyau nopa'āi janewyi mã'ē rupi tē tijaiko ky'y. Jane tē siauvay rewarà mō rōwã Wa'yry omuu. Aje a'e tē janerauvay rewarà mō tē omuu, tomãnō janeupewarà mō, janeaiwererà repykarà mō", e'i ikusiwa Juwã (1Juw. 4.9-10).

"Jesu Kiristu Janejare'e ayvu rômō ekoi", e'i mã'ē

1 ¹ [Ije Juwã. Aã kareta akusiwa, Jesu rē ojirovija mãe kô pè, tomã'ē ee. Jesu rekoa rē poromotekokuwa mã'ē tē akusiwa ajupa.] Janejare'e Ayvu poromoigo karuaru mã'ē eu Jesu pè. Karamoe remeve oikopa amãtejē iko. Yvy jinō e'ãve ekoipa teãmã. Ajaire ojimojane ojikuwa jane kô pytery pè uu. Oroenu poromotekokuwa iko remē ipi. Oromã'ē teve ee ipi. Orerea e'e pè tē oromã'ē ee. Orojipy teve ee. Orepo pè ywete orojipy ee. A'e a'e rewarà tē akusiwa ajupa tapekuwa.^a ² Ajaire ojikuwa jane kô pè, āwisō tijakuwa ky'y. Yvy jinō e'ãve Janejare'e pyri ekoi. Oiko karuaru iko. Age'e remē uve tē iko. A'e tē ojisa ore. Janerereko katuarà rômō uu. A'evoa teve oromome'u pejē orokupa. Janemoigoa rewarà oromome'u

^a 1.1 Juw. 1.1; J.Jim. 1.17

oroiko.^b ³Oromã'ê ee mã'ê tề oromome'u orokupa. ãmõ, orereminuwerà teve oromome'u orokupa, tapekuwa. Orojimony katu Janejare'e rề ipi. Janejare'e Ra'yry rề tề tesõ orojimony ipi, Jesu Kiristu rề. ãwitõ orojimony katu ee kõ ipi, tãwĩvo ve pejẽ tapejimony katu ve orere. ⁴Ajawyi kareta rề aepo orokusiwa peupe orokupa, pirujẽ tijanerory katu jẽsi jaiko.

Jesu rekoa rupi jaikoa rewarà

⁵Oroenu ijayvukwerà oremotekokuwa remẽ. Ajawyi orereminuwerà tề oromome'utà pejẽ. Kee e'i mã'ê: "Ikatuay wete Janejare'e. Nuvei 'ete ijaiwererà ee", e'i mã'ê. ⁶Nivoi jaiko remẽ, "Ajimony katu Janejare'e rề ipi", ja'e tite remẽ, janewarite janevote [Jane kõ pẽ]. Aje ywete mã'ê rupi rõwã jaiko. ãwitõ ava mõ pãtõnusu rupi ekoi remẽ, "Arakatu rupi aiko", e'i tite oupe remẽ, ãwĩvo. ⁷Ivo katu jaiko remẽ, Janejare'e rekoa rupi katu jaiko ipi. Jajimony katu jane kõ rề ãmẽ. Janejare'e janeaiwererà rề janepy'aky'a'opa Wa'yry Jesu mãnõa rupi, [ãwisõ ekoa rupi katu tijaiko.]

⁸Ajamã'ê kee ja'e sõ remẽ, janevote jajimoripetã tề: "Ereko tề. Nuvei 'ete eaiwererà mõ ere", ja'e sõ remẽ. Aje ywete mã'ê rupi rõwã sikaepo jaiko aepo ja'e remẽ. ⁹Ajamã'ê janeaiwererà jamome'u Janejare'e pề tijaneporijauesa ãwisõ oity janewyi remẽ. Ivo poroereko mã'ê tề a'e. Wayvu rupi katu ekoi mã'ê tề. Aje ywete janepy'aky'a'otã pirujẽ janeaiwererà moisyrya rề. ¹⁰Ajamã'ê kee ja'e sõ remẽ, "Nuvei 'ete eaiwererà ere. Najavyi 'ete Janejare'e ayvu mã'ê tề ije ipi", ja'e sõ remẽ, "Iwari tề Janejare'e eupewarã mõ", jaa tề aepo. [Kee e'i Janejare'e rewarã mõ: "Nuvei 'ete ivo teãmã mã'ê mõ", e'ipa rewarã mõ.] Noikoi Janejare'e ayvu janepy'a pupe aepo ja'e tite remẽ.

"Jesu Kiristu janeporijauesaoka Uu pề ipi", e'i mã'ê

2 ¹Eãkarãgwerã kõ, eayvu akusiwa pejẽ ajupa, napotai Janejare'e rekoa pejavy ipi rewarã mõ. Jane nisipotai jajavy. Japota ipe Jesu Kiristu vo jaiko, a'e ivo ekoi mã'ê tề. Ajamã'ê jajavy sõ remẽ, tijaityoka janeaiwererã Jesu Kiristu pề. A'e janeporijauesaoka Uu pề ipi. ²Jesu omãnõ janeupewarã mõ, janeaiwererã repykarã mõ. Janeupewarã mõ kõrijõ tề rõwã omãnõ. Pirujẽ yvy pewarã kõ pewarã mõ teve. [Ajawyi janeporijauesaoka Uu pề remẽ, "hoõ" e'i Wa'yry pề. "Awyjepa" e'itã teve janeaiwererã pề ãmẽ.]

³Janejare'e ayvu rupi katu jaiko remẽ, "Aje ywete, akuwa Janejare'e", ja'etã janepy'a pupe. ⁴Uve mirã kõ mõ, "Janejare'e akuwa", e'i teywete mã'ê. Ajamã'ê ijayvu rupi noikoi. Ajawyi iwarite aepo e'i remẽ. Naikoi Janejare'e ayvu aje mã'ê ipy'a pupe. ⁵Ava mõ Janejare'e ayvu rupi katu ekoi remẽ, aje ywete wauvay Janejare'e mã'ê tề a'e.

^b 1.2 Juw. 1.14; J.Jim. 1.18

Kee jakuwa Janejare'e revejẽ jaiko remẽ: ⁶Ava mō, “Janejare'e revejẽ aiko”, e'i remẽ, Jesu rekoa rupi toiko katu iko âmẽ. [A'evõ jaiko remẽ, jakuwapa Janejare'e revejẽ jaiko mã'ẽ.]

“Jesu ayvu rupi katu tijaiko ipi”, e'i mã'ẽ

⁷Eremiau kō, Janejare'e ayvu rupi manyvo tijaiko e'i maekwerà amome'u pejẽ ekareta rupi ajupa. “[Pe'itypyte rōmō tapeiko.] Tapejiauvay ojeeve peiko”, e'i maekwerà. Age'ewarà rōwã aepe jaa. [Karamoe remeve Jesu aepe e'ipa janeupe.] Aekwerà rupi katu tẽ ojenu pejẽ, Jesu rẽ pejirovija ypy remẽ. ⁸Ajamã'ẽ [ãwitō Jesu ayvu age'ewarà e'i aepe pẽ, a'evõ ve] age'ewarà teve eremikusiwarerà rupi jajiauvay ky'y. Nojikuwai janerauvay e'eay mijã. Janeaiwererà rupi tẽ jaiko ipi mijã. Jesu janerauvay rewarà mō tẽ ojikuwa jane ky'y. Pejẽ ve poroauvay Jesu kasia rupi remẽ, ojikuwa tary ve pejẽ âmẽ ipi. Nojikuwai mijã. Janejare'e rekoa nojikuwa ywe'ei ve mijã. Janejare'e reko e'ãma kōrijō tẽ ojikuwa mijã. Age'e Janejare'e rekoa ojikuwapa ypy iko janeupe ky'y. Ajawyi age'ewarà eu tẽ aepe jaa pẽ ky'y. ãwitō arakatu ojisa katu, ãwĩvo ve Janejare'e rekoa ojikuwa katu jane ky'y.

⁹Ava mō, “Janejare'e rekoa rupi aiko ipi”, e'i epe remẽ. Ajamã'ẽ Jesu koty rewarà kō mō rẽ ojikō'õ jẽ tesō iko remẽ, ovote ojimoripe. Janejare'e rekoa rupi rōwã ekoi apijarã. ¹⁰Jajiauvay remẽ tẽ Janejare'e rekoa rupi katu jaiko ipi. Nijajavyi Janejare'e rupi tekoua a'evõ jaiko remẽ. ¹¹Na'evõ ojikō'õ jẽ opyriwarã kō rẽ mã'ẽ. A'evõ remẽ, Janejare'e reko e'ãma rupi tẽ ekoi. ãwitō pãtõnusu rupi wata iko mã'ẽ nokuwai maty ootã mã'ẽ, ãwĩvo 'ejẽ Janejare'e reko e'ãma rupi ekoi mã'ẽ.

¹²Ja'yrerã kō pẽ kee a'e.

Janejare'e “awyjepa” e'ipa peaiwererã pẽ ky'y,

Kiristu omãnõ peupewarã mō rewarã mō.

Ajawyi aã kareta akusiwa pejẽ ajupa.

¹³Miratuwerã kō pẽ kee a'e teve.

Vvy jinõ e'ãve ekoi teãmã mã'ẽ pekuwa.

Ajawyi aã kareta akusiwa pejẽ ajupa.

Kõnomiokyry kō pẽ kee a'e, kōjãmukukyrerã pẽ teve.

Nivoi mãe kō rōvijã 'arã kyty tẽ peiko Jesu mãnõa rupi.

Ajawyi aã kareta akusiwa peupe ajupa.

¹⁴Ja'yrerã kō pẽ teve kee a'e.

Janejare'e pekuwapa, Jesu ruu.

Ajawyi aã kareta akusiwa pejẽ ajupa.

Miratuwerã kō pẽ kee a'e teve.

Vvy jinõ e'ãve ekoi teãmã mã'ẽ pekuwa.

Ajawyi aã kareta akusiwa pejê ajupa.
 Kõnomiokyry kô pè, kee a'e teve. Kõjãmukukyrrerà kô pè teve.
 Pekasiay ipi.
 Janejare'e ayvu rè pejipy'amogeta ipi.
 A'e ayvu rupi peiko ipi.
 Nivoi mõe kô rövijã 'arà kyty peiko ky'y.
 Ajawyi aã kareta akusiwa pejê ajupa.

“Nivoi tekoua rè ikõ tapejitupi e'ã nê”, e'i mõe

¹⁵ [Age'e pirujê aetã pejê ky'y. Uve mörijõ tekoua. Kejõ. Janejare'e rupi tekoua. ãmõ, nivoi mõe rupi tekoua. Mokojejõ.] Ajawyi, “Janejare'e rè noja'ai mõe kô rekoa rupi kuwasi aiko!” tapejê e'ã ikenê. Tapejitupi e'ã ikõ ãwĩ rapijarã rekoa rè nê. Ojitupi ekoa kô rè mõe noai Papa yvapewarã ipi. ¹⁶ Nivoi mõe kô rekoa rupi jipy'amogetaa remê, kee mõe. “Emy'arã römõ kuwasi!” eu remê. “Emoma'e römõ kuwasi!” eu remê teve. “Emoe'e kuwasi kupa!” eu teve remê. Aepe eu remê, Janeruwasu rekoa rupi katu rōwã jaiko ipi. Nivoi mõe kô rekoa rupi tẽ jaiko ãmẽ. ¹⁷ Opatã mõe rã pè tẽ aepe eu ipi. Temimotarã kô opatã mõe kô tẽ. Janejare'e remimota rupi ekoi mõe ãmẽ nopa'ãi. Oiko karuarutã ipyri.

“Jesu Kiristu ãpã uutã”, e'i mõe

¹⁸ Eãkarãgwerã kô, ke'ĩ yvy opatã. Kiristu ãpã kô uutã. Poromoripearã römõ uutã kupa. Aepe jaa ojenupa pejê. Ovãema iteetejê Kiristu ãpã kô ajamãê. Ajawyi jakuwa ke'ĩ yvy opatã mõe. ¹⁹ ãwĩ kô ojipe'a janepytery pe wyi. Jesu koty rewarã kô pytery pe wyi ojipe'a kupa. Janevo rōwã ajamãê kupa. Jesu koty reware'e kô rōwã kupa. A'e kô aje ywete sō Jesu koty rewarã kô römõ ekoi kupa remê, opyta kuwa janereve Jesu moe'e kupa mijã. Na'evoi kupa ajamãê. A'evõ ojikuwa ojirovija rã'ãga ee mõe kô römõ kupa.

²⁰ Ajamãê Janejare'e 'Ag uupa oike pepy'a pupe, Kiristu omuupa okoty rewarã kô pè mõe. A'e pemotekokuwaarã römõ uu, aje ywete mõe tapekuwa. ²¹ Ajawyi kee na'ei peupewarã mõi ipi: “Nokuwai aje mõe kupa rewarã mõi takusiwa ijupe kô imotekokuwaa kô römõ”, na'ei. Kee a'e kōrijõ tẽ: “Okuwapa iko aje ywete mõe kupa”, a'e kōrijõ tẽ ipi. “Okuwa teve aje ywete mõe rupiwarã naiko'ãi waria ipi. Ajawyi takusiwa ijupe kô imokasi kô”, a'e kōrijõ tẽ.

²² Iwari mõe kô kee e'i tite: “Janejare'e Remimuurerã rōwã Jesu. ãmõ, Janerövijã ywete römõ rōwã”, e'i tite. Kiristu ãpã kô tẽ aepe e'i mõe kô. Ava mõi Janejare'e Ra'yry noerovijai remê, Tuu noerovijai teve jaa tẽ aepe'i. ²³ Ava mõi, “Janejare'e Ra'yry rōwã Jesu”, e'i sō remê, eevejê rōwã Tuu ekoi ipi. “Janejare'e ra'yre'e tẽ Jesu”, e'i mõe reve tẽ Tuu ekoi ipi.

²⁴ Ajawyi kee a'e pejê. Tapeja'a jê ikõ Jesu rekoa rè peiko ipi nê. Jesu rè pejirovija ypy remê, peenu maekwerã rè. Peja'a jê ee peiko remê, Janejare'e

Ra'yry revejê peikotà ãmê. Tuu revejê teve peikotà ãmê ipi. ²⁵“A'evò peiko remê, Janejare'e pyri peiko karuarutà ky'y”, e'ipa Jesu jane. “Poromoigooka karuarutà Papa pyri”, e'ipa. Aepo e'i maekwerà rupi katu a'evotà ãmê.

²⁶Poromotekokuwa aã kareta rupi ajupa, pemoripe tarepe mæe kô rê. A'e kô opota ipe pemomoi Janejare'e wyi. Ajawyi tapeenu ywe'e tite e'ã ikô a'e kô ayvu nê. ²⁷[“Temotekokuwa Janejare'e ayvu rê kupa”, tapejê ywe'e tite e'ã.] Jesu Kiristu omuupa o'Ãg toike pepy'a pupe, pemotekokuwa mãê rômô. Pirujê Janejare'e ayvu rê pemotekokuwa ipi. Aje ywete mãê kôrijô tê omome'u ipi. Iwari mãê rôwã. Ajawyi kee a'e pejê. Pemotekokuwa mãê tê i'Ãg. Ajawyi pemotekokuwa ee mãê rupi ikô tapeiko nê, a'e. Jesu Kiristu revejê tapeiko ipi, a'e teve pejê.

²⁸Kãramô Jesu Kiristu ojisaoka tarà mijê ike uu yvy pè remê. Jesu revejê jaiko remê, ekoa rupi tijaiko ipi. ãmê tê Kiristu ovæe remê, nijakyje'ãi iwiyi. Nijajimosioka'ãi teve ovake. Janeroryvay kôrijôtà tê ovake, nijaity'ãi ekoa ipi rewarà mô. A'evò tapeiko awi, eãkarãgwerà kô. ²⁹Ivo katuy mãê tê Kiristu. Ajawyi ivo katua rupi ekoi mãe kô upi ve opoera mãê rômô tê ekoi ky'y. Pekuwapa a'evoa.

“Janejare'e ãkarãgwerà kô tê jane”, e'i mãê

3 ¹Janejare'e janerauvay wete ipi. Janerauvay teãmã janerereko. Ajawyi “eãkarãgwerà” e'i janeupe ipi. Aje ywete Janejare'e ãkarã tê jane. Janereinô wãkarãgwerà rômô. Ajamãê nojirovijai Janejare'e rê mãe kô nijanekuwai Janejare'e ãkarãgwerà tê jane jaiko mãê. Nokuwai Janejare'e kupa, ajawyi. ²Eremiau kô, age'evè tesô ijãkarã kô rômô jaikopa jaiko. Nijakuwaive manyvotà janerekoa rã. Ajamãê kee sikuwapa. Jesu uu mijê ojisaoka remê tê katu jamãê gatutà ee ky'y. Ivo jê jaikotà ãmê. A'evoa sikuwapa. ³Jesu væea 'arà jaãrô remê, jajireko katutà ivo e'ãa wyi ãmê. “Áwitô nuvei Jesu rê ivo e'ãa, tãwïvo jaiko”, ja'età.

⁴Nivoi sô jaiko ipi remê, jajavytà Janejare'e rekoa ipi. Ijavyvukasia sijavytà teve. A'evoa pè nivoi mãê eu.

⁵Pekuwa Jesu uu janeaiwererã reityoka janewyi. Pekuwa teve nuvei 'eteay ijaiwererã ee. Nojavyi 'eteay teve Janejare'e rekoa. ⁶Eevejê jaiko remê, nijamoane'e'ãi janeaiwererã ereko ipi. Ojimoane'e jê ee mãê, nokuwai Jesu mãê tê a'e. Nomãêi ee mãê tê.

⁷Ajawyi kee a'e pejê, eãkarãgwerà kô. Tapejimoripeoka e'ã ikô nê. Ivoa rupi ekoi mãê ivo katu ekoi ipi. Áwitô Jesu Kiristu ivo katu ekoi, áwïvo. ⁸Ojimoane'e jê ivo e'ãa rupi ekoi mãê ãjãgai rövijã rekoa rupi tê ekoi ipi. Yvy jinô ppy remeve ãjãgai rövijã nivoi ekoi mãê teãmã. Aekwerà ve ekoi age'e remê. Ajawyi Janejare'e Ra'yry uu ike yvy pè remê, ãjãgai rövijã manyvo poroereko mãê omomatã jane wyi ky'y.

⁹Janejare'e ãkarã kô ekoa rupi katu tê ekoi ipi. Nojimoane'e'ãi nivoi tekoua rê kupa ipi, Janejare'e 'Ãg ipy'a kô pupe ekoi rewarà mô. Ivo e'ãa

rupi noikoi kupa, Janejare'e ākarā kō tē rewarā mō. ¹⁰A'evo Janejare'e ākarā kō ojikuwa ipi. Ajāgai rōvijā remīgwai kō teve ojikuwa. Ivo e'āa rupi kōrijō tē ekoi kupa ipi. Jesu koty rewarā kō noai kupa ipi. Janejare'e ākarā rōwā a'evo ekoi mae kō āmē. Ajāgai rōvijā remīgwai kō tē a'evo ekoi mae kō.

“Tijajiauway ojeeve jaiko”, e'i mǎē

¹¹Pejirovija ypy Jesu rē remē, peenupa manyvo tijaiko. “Pejiauway ikō peiko ipi nē”, e'i mǎē.^c ¹²Tāmō Atāo ra'yry Kāi reruparā mō tijaiko e'ā ky'y. Nivoi mǎē rōvijā rekoa rupi ekoi mǎē tē itōkō Kāi. Noai omōmirī mǎē tē a'e. Ojikōō ee wyi ojuka omōmirī. Ivo katu imōmirī ekoi wyi ojuka.^d

¹³Ajawyi kee a'e pejē, eretārāgwerā kō. Noerovijai Janejare'e mae kō ojikōō pene remē, “Manyvo rewarā mō pōkō ojikōōtā ere?” tapejē e'ā. Ekōa teāmā kupa.^e

¹⁴Na'evoi jane āmē. Jesu koty rewarā kō siauvay ipi. Jypy remē janereko ai rupi kōrijō tē jaiko remē, jane'āg omānō mǎē vo 'ejē Janejare'e kyty jaiko mijā. Ajaire Jesu rupi jane'āg uve mijē. Ajawyi janereko pyau nopa'āi mǎē rōmō tē jaiko ky'y. A'evo sikuwa jajiauway remē. Nijajiaui sō remē omānō mǎē vo 'ejētā jaiko.^f ¹⁵Ava mō sō Jesu koty rewarā mō rē ojikōō remē, “Mirā jukaarerā tē āwī”, e'i Janejare'e ijupewarā mō. “Ojipy'amogeta ai rupi mirā ojuka”, e'i. Pekuwa apijarā noiko karuaru'āi ipyri.^g ¹⁶Jesu Kiristu janerauvay wyi janeupewarā mō tē ekoi jē iko. Ajaate omānō janeupewarā mō. Āwīvo kuwa ve janevoarā kō sireko. Jaauway kō. Ijupewarā kō mō tē jaiko. Jaauway karuaru kō ajaate jamānō pe'ī. ¹⁷Ma'e. Āmō, imoma'e ywete ipe mǎē sō omā'ē iporijau mǎē rē remē, toporijauesa. Noporijauesai sō remē, manyvo noiko'āi Janejare'e ayvu rupi oiko rōmō! A'evo mǎē wau rā'āga tē Janejare'e. Oporegeta rupi tē wau rā'āga ipi. ¹⁸Āwīvo rōwā jaiko, eākarā kō. Janeporegeta rupi kōrijō tē rōwā jaau ipi. Aje ywete Janejare'e tijaau ipi. Āmō, jane kō ve aje ywete tijaau iporijauesa kō ipi.

“Nijajinōsī'āi Janejare'e rovake”, e'i mǎē

¹⁹A'evo poroporijauesa mǎē rupi jaiko remē, jakuwa aje ywete mǎē rupiwarā tē jane. Nijajinōsī'āi Janejare'e rovake āmē. Janemopiryvypy katutā japoregeta ijupe remē. ²⁰Nivoi jaiko remē, janepy'a pewarā nivoi mǎē omo'y maevo sō tite janere ipi. “Nivoi neiko!” e'i janeupe, janepy'a pupe. Kee ja'e āmē: “Janejare'e okuwa teāmā epy'a pewarā. A'e rovake ajimome'utā, teporijauesa. A'e ywesō ikasi epy'a mopiryvypy katua

^c 3.11 Juw. 13.31-35 ^d 3.12 Jinō. 4.8 ^e 3.13 Juw. 15.18-19 ^f 3.14 Juw. 5.24
^g 3.15 Mat. 5.21-22

rè”, tija'e ijupe. ²¹Ajawyi kee a'e pejê, eremiau kô. Nijajipy'amogetai janeaiwererà mō rè jajimopirai remê, nijajinôsî'ai Janejare'e rovake. Janepy'akasità japoregeta ijupe âmê. ²²Pirujê japoranu ijupe mǎê ome'ê jane ipi, ijayvu rupi jaiko remê, emimota rupi jaiko rewarà mō.

²³Kee e'i janeupe Janejare'e manyvo tijaiko: “Era'yry Jesu Kiristu rè ikô tapejirovija ipi nê”, e'i. Kee e'i teve: “Pejiauvaya ikô ojee peiko nê”, e'i teve. Āwitō Jesu aepo e'i ike yvy pè ekoi remê, āwīvo ve Tuu e'i jane. ²⁴Janejare'e rekoa rupi jaiko remê, eevejê jaiko ipi. A'evo ve Janejare'e janerevejê ekoi ipi. O'Āg omurokapa inō janepy'a pupe. Ajawyi jakuwa janerevejê ekoi mǎê, i'Āg tē aepo omojikuwaoka janeupe rewarà mō.

Poromoripe mǎe kô mojikuwapa

4 ¹Tapeenu katu ikô eayvu nê, eremiau kô. Uve mirà kô, “Janejare'e 'Āg tē emo'eoka”, e'i teywete owari rōmō mǎe kô. Ijatyry āwī rapijarerà kô mirà kô pyterà rupi ekoi ipi. Janejare'e ayvu mojenuarà rǎ'āga kô tē āwī rapijarerà kô. Ajawyi “aje” tapejê e'ā aepo e'i mǎe kô pè ipi. Tapeā'ā rǎ'ī esa. Kee tapejê rǎ'ī ikuwa: “Janejare'e ayvu rupi tē pōkō aepo e'i mijā? Ājāg ayvu rupi tē pōkō?” tapejê ikuwa esa. ²Tapejapyaka katu rǎ'ī ikô jane kô ayvu rè ikuwa ipi nê. Janejare'e 'Āg tē omo'eoka mǎê kee e'itā: “Janejare'e Remimuurerà tē Jesu Kiristu. Ojimojane uu jane kô pytery pè Janerōvijā ywete rōmō”, e'itā. ³Ajamǎê Janejare'e 'Āg nomo'eokari mǎê kee e'i: “Nojimojanei Jesu. Ojimojane maevo sō tite janepytery pè”, e'i mǎê. Kiristu āpā tē aepo omo'eoka kô. A'e vāea rǎ ojenupa jypy remeve pejê. A'e jane kô pytery pè ekoipa ky'y. [A'e tē poromoripe poroereko ky'y.]

⁴Janejare'e pewarà tē itōkō pejê, eākarāgwerà kô. Pepy'a pupe i'Āg ekoi. Ajawyi poromo'e rǎ'āga mǎe kô opota ipe pemoripe remê, Janejare'e 'Āg napemoripeoka'ai ijupe kô. I'arà kô gyty peiko, Janejare'e 'Āg kasia rupi. A'e ywesō ikasiay ājāgai rōvijā wyi. ⁵A'e poromo'e rǎ'āga mǎe kô wekoa rupi tē oporegeta otekokuwa e'ā rōmō ipi. Ajawyi noerovijai Janejare'e mǎe kô tē wenu katu ijayvu kô ipi, ojevoarà tē kupa rewarà mō. ⁶Jane âmê Janejare'e koty rewarà kô rōmō jaiko. Ijayvu rupi katu japoregeta ipi. Ajawyi Janejare'e okuwa mǎe kô tē wenu janeayvu ipi. Janejare'e noerovijai mǎe kô âmê nojapyaka tari janeayvu rè jamome'u remê ipi. A'evoa rupi jakuwa Janejare'e 'Āg rupi oporegeta mǎe kô, aje ywete mǎê rupi oporegeta mǎe kô ipi. Āwīvo ve jakuwa teve ava mō oporegeta janemoripe remê ipi.

“Poroauvaya jarà tē Janejare'e”, e'i mǎê

⁷Tapeenu katu ikô eayvu nê, eremiau kô. Kee a'e pejê. Tapejiauvay ojee peiko. Janejare'e tē oinō jiaupa janeupe. Ajawyi tāwīvo peiko, a'e tē jiauvaya oinō ypy rewarà mō. A'evo jaiko teāmā, Janejare'e ākarā kô

rômõ jaiko remẽ. Janejare'e sikuwa mãe kô tẽ jane ãmẽ. ⁸Noporoau mãe kô nokuwai Janejare'e ipi. Poroauvay mãẽ tẽ Janejare'e. A'e ywesõ poroauvay ipi. ⁹Kee Janejare'e omojikuwa janerauvaya janeupe. Wa'yry wyjaveay mãẽ omuroka ike yvy pẽ janepytery pẽ janerereko katurarã rômõ, ãwisõ janereko pyau nopa'ai janewyi mãẽ rupi tẽ tijaiko ky'y. ¹⁰Jane tẽ siauvay rewarã mõ rõwã Wa'yry omuu. Aje a'e tẽ janerauvay rewarã mõ tẽ omuu, tomãõ janeupewarã mõ, janeaiwererã repykarã mõ. [Nisikuwaive Janejare'e remeve a'evõ ekoi.]

¹¹Ajawyi kee a'e pejẽ, eremiau kô. ãwitõ janerauvay Janejare'e, tãwivo ve tijajiauvay ojee jaiko. ¹²Nomã'ëtytyi ajamã'ẽ Janejare'e rẽ ipi. Ajamã'ẽ jajiauvay ojee jaiko remẽ, janepy'a pupe ekoi ipi. ãwĩ ve tẽ ojikuwa jiauvaya janeupe ipi remẽ.

¹³Jakuwa Janejare'e revejẽ jaiko. Jakuwa teve janerevejẽ ekoi. O'ãg omuu janepy'a pupe rewarã mõ tẽ aepo jakuwa. ¹⁴Ore yveve oromã'ẽ ee rewarã mõ oromojenu eewarã ipi. "Tuu Wa'yry omuu tomãõ rã'i pirujẽ jane kô aiwererã repykarã mõ", oro'e imojenu ipi. ¹⁵Ajawyi ava mõ, "Janejare'e Ra'yry tẽ Jesu", e'i remẽ, Janejare'e eeve ekoi ipi. ãmõ, Janejare'e reve ekoi ipi. ¹⁶Jakuwa janerauvaya. "Erau sipõ Janejare'e mijã?" nija'ei ãmẽ ijupe. "Aje ywete erauvay", ja'e kōrijõ tẽ.

Poroauvay mãẽ tẽ Janejare'e. Ajawyi ava mõ jiauvaya rupi ekoi remẽ, Janejare'e revejẽ ãmẽ ekoi. Ivo ve Janejare'e, eevejẽ teve ekoi. [Jiauvaya rupi ojikuwa.] ¹⁷Janejare'e poroauvayoka ojee ipi. ãwitõ Jesu poroauvay, ãwivo ve jane. Ajawyi kãramõ Jesu uu mijẽ ivo mãe kô moe'yi nivõ mãe kô wyi remẽ, nijajimonyi'ai ovake, [poroauvay teãmã poroereko rewarã mõ]. ¹⁸Ava mõ jiauvaya rupi ekoi remẽ, nojimonyi Janejare'e rovake ipi. Moma'e rẽ nijajimonyi'ai a'evõ jaiko remẽ. Noporoau ywe'ei mãẽ tẽ ojimonyi ipi. "Emomorijau 'atã tẽ maevo", e'i oupe rewarã mõ ojimonyi. Noporoau ywe'ei rewarã mõ opy'a pẽ aepo e'i.

¹⁹Janejare'e ppy janerauvay. Ajawyi tẽ jane ivo ve jajiauvay ojee jaiko. ²⁰Ava mõ, "Auvay Janejare'e", e'i paire katu, ojikõõ jẽ opyriwarã Jesu koty rewarã mõ rẽ remẽ, iwaritã tẽ aepo e'i. Emã'ẽ. Ojisa ijupe mã'ẽ noauive ipi. Tysi tõ nomã'ëtytyi ee mã'ẽ noau'ai teve kupa! ²¹Kee e'ipa Jesu Kiristu janeupewarã mõ: "Ava mõ wauvay Janejare'e remẽ, ikoty rewarã kô toauvay kô ve ipi", e'ipa jane.

"Jesu janemokasi tijajirovija jẽ ee", e'i mã'ẽ

5 ¹Janejare'e Remimuurerã tẽ Jesu Janerõvijã ywete rômõ. Aja pẽ, "Õõ aje", ja'e remẽ, Janejare'e ãkarã e'e rômõ jaiko jane. Aje Janejare'e jaauvay remẽ, ijãkarã kô ve jaauvay ipi. ²Janejare'e jaauvay remẽ, ijayvu rupi jaiko teãmã. ãmẽ jakuwa ijãkarãgwerã kô ve jaauvay. ³Janejare'e wauvay mã'ẽ ijayvu rupi ekoi ipi, "Pejiauvay ikõ ojee peiko nẽ", e'i maekwerã rupi. Niwaypei ijayvu rupi tekoua janeupe,

[Ijākarāgwerà kō rōmō jajiauway jaiko remē]. ⁴Ijākarāgwerà kō rōmō janekasi noerovija tari mǎe kō rē ipi, oityoka ipe Janejare'e rē jajirovija mǎ'ē janeupe kupa remē. Jesu rē jajirovija rewarà mō tē nikasi'āi āwī rapijarà kō janeupe ipi. ⁵Janevote rōwā janekasi noerovijai Janejare'e mǎe kō rē ipi. “Aje, Janejare'e Ra'yry tē Jesu”, ja'e remē tē janekasi. Ajawyi Janejare'e noerovijai mǎe kō noityokai sire'e Jesu rē jajirovija mǎ'ē janeupe.

Temikuwa Jesu Kiristu

⁶Jesu Kiristu uu ojimojane ojikuwa remē. Yy pē rā'ī ojimojāmoriōka Janejare'e remimota rupi, oposiko ypy remē. A'evo ekoi remē ojikuwa Janejare'e Ra'yry rōmō. Ajaire omānō remē, ipirā pe wyi oē wyykwerà. Janejare'e Ra'yry rōmō teve a'evo ekoi. Āwitō ojimojāmoriā rupi ojikuwa Janejare'e Ra'yry rōmō, āwīvo ve omānōa rupi ojimojikuwa teve. Janejare'e Āg tē omojikuwaoka Wa'yry rōmō. A'e aje ywete mǎ'ē kōrijō tē omojikuwaoka ipi. ⁷Kee Jesu ojikuwa Janejare'e Ra'yry rōmō. ⁸I'Āg omojikuwaoka tojikuwa. ^hĀmō, ojimojāmoriōkaa rupi teve ojikuwa. ⁱĀmō, omānōa rupi ojikuwa. ^jĀwī āwī kō rupi Jesu ojikuwaoka Janejare'e Ra'yry rōmō mǎ'ē. Moapy rōmō tesō omojikuwaoka. ^k⁹Janejare'e tē omojikuwaoka Wa'yry. Ajawyi “aje ywete” taoty ijupe ipi. “Iwarite” nija'ei jane kō remimojenuwerà pē ipi. “Aje ywete Janejare'e remimojenuwerà tē” ja'e kōrijōtā tē. Kee e'i itōkō Janejare'e remimojenuwerà: “Era'yre'e tē āwī”, e'i. Ajawyi tijarovija ikō āmē ipi nē. ¹⁰Jajirovija Janejare'e Ra'yry rē remē, jakuwa aje ywete a'evoa ipi. Janepy'a pupē jakuwa, Janejare'e Āg tē omojikuwaoka janeupe rewarà mō. Ajamǎ'ē Janejare'e noerovijai mǎe kō, “Ānī. Janejare'e Ra'yry rōwā Jesu”, e'i kōrijō tē kupa ipi. “Iwarite Janejare'e e'i”, jaa tē aepo e'i mǎ'ē, a'e yeve “Era'yry tē Jesu”, e'ipa rewarà mō. ¹¹Kee jaa Janejare'e omojikuwaoka janeupe. Ta'yry rē jajirovija remē tē kuwa tekoua pyau ome'ē janeupe māerā upi tijaiko.

¹²Janejare'e Ra'yry rē jajirovija remē tē māerā tē eeve jaikotā jaiko. Nojirovijai ee mǎe kō āmē noiko'āi ipyri.

Kareta moawyjepaa

¹³A'evoa akusiwa pejē, Janejare'e Ra'yry rē pejirovija mǎe kō rōmō. Akusiwa pemokasia pē ajupa, tapekuwa Janejare'e pyryvo peiko karuarutā. ¹⁴Nijajinōsī'āi Janejare'e rovake ipi. Moma'e mō jaokwai

^h 5.8 Janejare'e Āg pykau rōmō owygy uu Jesu apyte 'aryvo imojikuwaoka, ojimojāmoriōka remē. Mat. 4.16-17; Ruk. 3.21 ⁱ 5.8 Yva pe wyi itōkō Janejare'e, “Era'yre'e tē āwī”, e'i a'evo remē. ^j 5.8 Jesu omānō remeve, Janejare'e vvy omotyty tesō. Omomioka kwaray imojikuwaoka. Ajawyi sota rōvijā, “Janejare'e Ra'yry tē sipō āwī”, e'i Jesu pewartā mō omānō remē. ^k 5.8 Mat. 17.1-13; Mak. 9.2-13; Ruk. 9.28-36

ijupe remẽ, wenu jẽ ipi. Emimota rupi jaokwai remẽ, ome'êtà janeupe ipi. Janejare'e wenu'atà janeayvu. ¹⁵Sikuwapa teve Janejare'e wenu janeayvukwerà moma'e siokwai ijupe remẽ upi upi. Ajawyi sikuwa ve ome'êtà janeremikwaiwerà janeupe ipi.

¹⁶Ajawyi kee tapeiko. Pemã'ẽ sô Jesu koty rewarà mō rē nivei ekoi remẽ, tapeporegeta Janejare'e pè ijupewarà mō ipi. “Eityoka ijaiwererã ijupe tojimokãjã e'ã newyi”, tapejẽ ijupe. Janejare'e wenu'atà aepo pejẽ remẽ. Ajamã'ẽ ava mō sô awyje ojimoãpã ywe'e tite Janejare'e rē remẽ, Janejare'e noenu'ãi japoranu ipe ijupewarà mō remẽ. Omoisyry amãtejẽtã owiyi ãmẽ. Ovote ojimoai ãwĩvo remẽ. Nojivy'ãi Janejare'e kyty ãmẽ ky'y. A'evo mã'ẽ pewarà mō rōwã tapeporegeta ajamã'ẽ Janejare'e pè. ¹⁷Janejare'e rekoa jajavy remẽ, janeaiwererã jareko jẽ ãmẽ janereve ipi. Ajamã'ẽ nijajimoãpã Janejare'e rē remẽ, Janejare'e oityoka jẽtã janeaiwererã janewyi janemoigo karuaru opyryvo janerereko ipi. ãmõ, janeãgyo kōrijõ janeaiwererã rē remẽ. [Ajawyi Janejare'e pè nojimoãpã mãe kō pewarà mō tapeporegeta jẽ ijupe ijaiwererã toityypyypaoka iwiyi kō ipi, a'e pejẽ.]

¹⁸Sikuwa Janejare'e ãkarãgwerà kō nojimoane'e'ãi ojimojaiwe iko ipi. Janejare'e Ra'yry wereko katu kō a'evo toiko e'ã kupa ipi. Ajawyi nivei mã'ẽ rōvijã nikasi'ãi ãmẽ ee kō ky'y. Nomoane'e kō okai sire'e.

¹⁹Sikuwa Janejare'e ãkarãgwerà kō tẽ jane, Jesu rē jajirovija mãe kō rōmõ. Na'evoi Jesu rē nojirovijai mãe kō. A'e kō nivei mã'ẽ rōvijã po pè ekoi.

²⁰Kee aje ywete ipi. Janejare'e Ra'yry uu ike yvy pè janemotekokuwaarã rōmõ. A'e Janejare'e omojikuwaoka janeupe. Ajawyi Janejare'e revejẽ jaiko ky'y. Ta'yry Jesu Kiristu revejẽ teve jaiko. Janejare'e ywete Jesu omuroka yvy pè tojimojane. Janemoigo karuarutã Janejare'e pyryvo mã'ẽ tẽ. A'evoa sikuwapa.

²¹[Janejare'e rōmõ'ite jamoe'e ipi, eãkarã kō.] Ajawyi tapejireko katu ikõ ijarã rã'ãga kō wiyi nẽ, a'e pejẽ.

[Awyjepa eayvu amojenu ky'y, eãkarãgwerà kō.]